

姑墨國王治南城去長安八千一百五十里戶三千五

百口二萬四千五百勝兵四千五百人姑墨侯輔國侯

都尉左右將左右騎君各一人譯長二人東至都護治

所二千二十一里○宋祁曰監本作千二十里晏本作二千二十里南至于闐

馬行十五日北與烏孫接出銅鐵雌黃東通龜茲六百

七十里王莽時姑墨王丞殺溫宿王并其國

溫宿國王治溫宿城師古曰今雍州醴泉縣北有山名溫宿領者本因漢時得溫宿國人

令居此地田牧因以為名去長安八千三百五十里戶二千二百口

八千四百勝兵千五百人輔國侯左右將左右都尉左

右騎君譯長各二人東至都護治所二千三百八十里